

# Juniorski šampioni Australian Open-a 2005

## DONALD YOUNG

## VIKTORIJA AZARENKO

### CIKASTA LJEVICA I BJELORUSKA PRINCEZA

**D**ečko iz siromašnog predgrađa, Donald Young, ni slutio nije da će se tako rano upisati u tenisku istoriju. Na Otvorenom prvenstvu Australije 2005. postao je najmlađi prvak juniorskih Grand slam takmičenja i najmlađi "Broj 1" u ovoj konkurenciji sa svojih 15 godina i 191. dan života. U finalu završnice u Melbournu kao drugi nosilac, lako je stigao do trona slomivši prvog favorita takmičenja, protivnika iz Južne Koreje, Sun-Jong Kima (6:2, 6:4).



#### LIČNA KARTA

##### DONALD YOUNG

**Datum rođenja:** 23. jul 1989.  
**Mjesto rođenja:** Chicago  
**Igračka ruka:** lijeva  
**Visina:** 1,75  
**Težina:** 65  
**Profesionalac:** od 2004.

- Od samog početka takmičenja na ITF turnirima želio sam biti najbolji, ali nisam ni sanjao da će sve ovako ispasti i sad mi se to ne čini ništa posebno. Možda, kada ugledam svoje ime na leaderskoj poziciji rang liste najboljih juniora svijeta, promijenim mišljenje, možda mi se sviđi ta činjenica - izjavio je poslije australijskog finala ljevoruki tamnopusi Amerikanac, čekajući roditelje ispred Kazina gdje on zbog godina ima embargo na ulazak.

Još nešto vezano za Younga: ima epitet "Prvi put u istoriji". Mladi Donald je prvi afro-amerikanac koji se našao na vrhu ITF liste.

Zasluzeno, trofej juniorske šampionke prvog Grand slama u godini, otišao je u ruke, krhkoj Bjeloruskinji, Viktoriji Azarenko. U prosjeku po mečevima tokom cijelog turnira nije izgubila vise od tri gema, a u finalu je "tukla" Mađaricu, Agnes Szavaj 6:2, 6:2. Time je Viktorija postala prva teniserka iz svoje zemlje koja se našla na pijedestalu jednog Grand slama i na krovu ITF liste.

- Meč nije bio tako lak kao što rezultat govori. Odigrala sam najbolje što znam i psihički ostala čvrsta tokom cijelog meča. Ovo je veliki korak za mene i nadam se da ću ovako nastaviti- rekla je poslije trijumfa u Melbournu.

Nježna plavokosa Bjeloruskinja živjela je i trenirala u rodnoj zemlji od svoje sedme godine do prošle godine kada je poslije US Opena otišla da se kali u Španiji na Akademiju Hofsasa u Marbelu. Viktorijin trener je Nijemac. Idoli nove šampionke Australian Opena su Safin i Kuznjecova. Azarenko je već igrala polufinala juniorskih Grand slamova, na Wimbledonu i US Openu.

-Na Wimbledonu sam izgubila od Ane Ivanović, a u New Yorku od Mihaele Krajcek.

Ove sezone, Viktorija će se usredsrediti na profi konkurenciju gdje ima limitiran broj takmičenja (zbog godina) na 10. Već je odigrala jedan turnir, nagradnog fonda 25.000 hiljada dolara i u singlu stigla do četvrtfinala, a u dublu otišla i korak više, u polufinale. Stručnjaci u njoj već vide veliku nadu svjetskog tenisa i djevojčicu koja će uskoro pomrsiti račune "velikim djevojkama".

#### LIČNA KARTA

##### VIKTORIJA AZARENKO

**Datum rođenja:** 31. jul 1989. u Minsku  
**Igračka ruka:** desna  
**Težina:** 55  
**Rejting:** 452. na WTA listi  
**Profesionalac:** od 2003.

